

---

Saksnr:	2020/39918-6
Saksbehandlar	Kristin Arnestad og Ingjerd Skogseid
Dato:	18.01.2021

---

---

**Til:** Hovudutval for næring

---

**Frå:** Konstituert fylkesdirektør innovasjon og næring

---

## Søknadar frå kommunale næringssselskap - ei orientering

### Bakgrunn for dette notatet

I møte i hovudutval for næring 12. januar 2020 bad ein av representantane om at administrasjonen vurderte to søknader på nytt. Dette gjaldt søknaden frå Sogn Næring omtala i PS 2/2021 og søknadane frå Haugaland Vekst i RS 6/2021.

Dette vart ikkje reist som eige framlegg og fremja til handsaming i møtet. Hovudutvalet tok dermed ikkje stilling til saka og sendte ikkje over vedtak til vidare handsaming i administrasjonen.

Administrasjonen har ikkje fått ny informasjon som påverkar tidlegare vurderingar, og har difor ikkje gjort om på vedtaket knytt til Haugaland Vekst, eller endra tilrådinga i saka om partnerskapsmidlar. I notatet vert dette grunngjeve.

### Støtte til kommunal næringsutvikling

Vestland fylkeskommune vurderer begge som viktige aktørar i sine område, og tilråding om avslag i dei aktuelle tilskotssakene er difor ikkje grunngjeve med om desse er viktige aktørar eller ikkje.

Sogn Næring er vurdert å vere utanfor den ordninga dei søkte om. Haugaland Vekst søkte ikkje på ei ordning, og eit eventuelt tilskot er vurdert til å ikkje vere i tråd med utvalet sine retningslinjer for verkemiddelbruk. Omsynet til likehandsaming har også i stor grad påverka vurderinga av begge søknadane.

Kommunar og regionråd, og aktørar som driv kommunalt og interkommunalt næringsutviklingsarbeid og samarbeidsprosjekt mellom fleire kommunar, og mellom kommunar og regionråd, er vurdert å falle utanom partnerskapsordninga. Grunnen til dette er at vi rår til å vurdere den kommunale næringsinnsatsen (inkludert ulike samarbeidskonstellasjonar) samla, og sett i samanheng med mellom anna samarbeid med regionråda og det nye prosjektet Heilskapleg entreprenørskapsstøttesystem. I eit nytt fylke, med nye ordningar og strukturar er det særleg viktig å sikre likehandsaming av ulike initiativ ulike stader i fylke.

Planen var å vurdere den samla næringsinnsatsen i samband med sak om utforming av kommunale næringsfond. Når denne posten no er tatt vekk i budsjettet ser vi det som naturleg at denne vurderinga skjer i samband med iverksetjing av ny regional plan og utforming av den første fireårige handlingsprogrammet.

Dersom hovudutvalet ynskjer å støtte kommunalt/interkommunalt/regionalt næringsutviklingsarbeid rår vi til at de ser på nokre felles prinsipp for ei slik ordning slik at alle aktuelle søkjarar får felles informasjon og moglegheit til å søkje. Døme på problemstillingar som kan drøftast:

- Skal ein gje driftstilskot eller anna type støtte

- Tak på tilskotssum og ramme på ei slik ordning
- Skal det vere same sum i tildeling eller differensierast?
- Skal det stillast krav til aktivitet eller kvalitet på arbeidet?
- Ynskjer ein å støtte kommunalt næringsutviklingsarbeid generelt? Førstelineteneste spesielt etc.?
- Skal kommunar med næringsapparat i eigen organisasjon kunne søkje, eller ynskjer ein berre støtte organiseringar som dekkjer fleire kommunar?
- Skal alle typar organiseringar kunne søkje?

Særleg om Sogn Næring og aktiviteten knytt til næringshageprogrammet

Sogn Næring har i sin søknad også lagt vekt på oppgåver knytt til det regionale samarbeidet mellom kommunar, og si rolle som operatør i næringshageprogrammet. Regionalt samarbeid vil bli vurdert av ei anna avdeling i samband med eventuelle avtalar med regionråd. Når det gjeld næringshagearbeidet så er det i hovudsak næringshagar i næringshageprogrammet som er tilrådd støtta. Då har vi lagt vekt på at vi rår til å støtte alle desse næringshagane likt, og at det er programmet vi rår til å støtte. Vi føreset at der det er fleire operatørar så samordnar dei seg. Dette gjeld også for Sogn Næringshage, der Sogn Næring er ein av to operatørar.

Det er to unntak frå vurderingane om at det berre er næringshagar i næringshageprogrammet som vert støtta og at næringshagane får støtte berre «ein gong»/til programmet.

Odda (no Ullensvang) næringshage er nye i partnerskapsordninga og dei er ikkje del av næringshageprogrammet. Dei er i samarbeid med Næringshagen på Voss og Næringshagen Hardanger i gang med eit større arbeid for å finne ny organisering og samarbeid. Grunnen for å gje støtte her er å ha eit tilsvarende tilbod som næringshageprogrammet i heile regionen, og å sikre eit meir robust framtidig tilbod.

Inviro AS er hovudsakleg tilrådd støtte på bakgrunn av klyngearbeidet sett i gang knytt til automasjonsarbeidet, og som ei vidareføring av arbeidet som tidlegare blei kalla Fjordane Virtuelle Campus og som har vore støtta av Sogn og Fjordane fylkeskommune.